



 Glygge-Zyttig vo de
JOKER WAGGIS

Usgoob 11 - im Meerz 2017

Joker Lädeli

E neue Artiggel

SYTTE 2



Unter der Lupe

Der Fäb

SYTTE 2



Basler Fasnacht 2017

S'Programm stoot

SYTTE 3



Basler Fasnacht 2016

Miir bligge nomol zrugg:

Scho isch e Joor vergange
syt der Fasnacht 2016. Fir
d'JOKER WAGGIS isch es
aimol mee e Spezielli gsi.
Zem 20. Mol uff der Route,

aber zem erschte Mol zu
zäänt uff em Waage - esoo
wär's ämmel plant gsi,
doch amme kunnt's hald
andersch als me dänggt ...



S'Gruppfeteli vo der Basler Fasnacht 2016 ... laider nit mit Vollbestand.

Am Fasnachts-Mäntig isch es
wie iiblig Mitti Moorge wiider
los gange; Besammlig zem
Waagelaade!

Nonig ganz niechter und e
weeneli uff de Wegge, hän
sich d'JOKER WAGGIS - mit
Usnaam vo de Stadtbasler -
ans Wärgg gmacht.

Routiniert und ooni gresseri
Uffreegig isch so der Waage
innert gnapp ere Stund
fasnachtsberait gmacht gsi.
Dangg däm, het sich denn
der Draggdoor-Faarer
friezyttig und gmietlig
kenne uff e Wäg an
Wettstaiplatz mache.

Am Wettstaiplatz
aakoo, hän scho die
erschte Passive uff
d'JOKER WAGGIS
gwart - schliesslig
isch der tradizioonell
Fasnachts-Apero uff
em Programm
gstande.


Bild rächts: Der Neuling
het sich rasch yygläbt bi
de JOKER WAGGIS ...

Pinggtlig um 13:30 Uhr isch
es denn - esoo wie s'Comité
das winscht - uff d'Route
gange. Au wenn die erschte
Meter allewyyl e Yygweene
sinn, hän d'JOKER WAGGIS
schnäll wiider iire Dritt gfunde
und hän sich bald nimme loo
stoppe!

Guet ... der aint oder ander
Stopp het's denn ainewääg
gää. Schliesslig het sich e
rächte Waggis au emol syy

Pause verdient.
Vor allem, wenn
me die maischt
Zyt - trotz
Waage -
z'Fuess iiber e
Cortège zieht.
Zem s'Sujet so
rächt uszlääbe,
het sich das
aifach aabotte,
schliesslig hän
d'Zivilischte am
Strosserand
unbedingt vo de
beese Waggis
und iire Wääge

WYTER SYTTE 2



Sicher isch sicherer ... verdummi nomol!

FORTSETZIG

miesse beschützt wärde.

Ganz esoo ärscht isch es aber doch nit gsi - was au d'Zueschauer relativ schnäll gmeert hän.



D'JOKER WAGGIS warne iiber d'Gfoore am Cortège ... mit e weeneli Ironie derby!

Der Fasnachts-Zyschtig het au an der vergangene Fasnacht wiider der Binggis gheert. Daagsiiber isch me individuell mit em Binggis-Wäägeli und em Nachwuggs uff der Zyschtigroute aazdräffe gsi. Am Oobe isch tradizioonell d'Birsig-Sinfonie uff em Plan gstande. Und doo dermit s'Bar-Wäägeli im Mittelpunggt. Bis wyt in d'Nacht isch me esoo unterwägs gsi ...

Schliesslig isch no der Fasnachts-Mittwuch aagstande. Nach em

gliche Zytplan wie 2 Dääg vorhär, isch es wiider Mitti Moorge in Muttenz los gange. Wie scho an de Dääg vorhär, isch s'Wätter au an däm Daag nit draumhaft gsi, aber mit ushaltbare Temperature und vor allem meerhaitlig drogge, darf me sich definitiv nit beglaage.

Wie allewyy, isch au d'Fasnacht 2016 schlussändig wiider vyy! z'schnäll verby gange. Aber nadyrlig wird sii bi de JOKER WAGGIS no lang in gueter Erinnerung blibe.

So zem Byspiil bim Galli, wo am Fasnachts-Mäntig het deerfe syy Geburtsdaag fyre. Und doo derby isch er nach em Cortège vo der Familie, Frinde und de JOKER WAGGIS mit eme glaine Apero iiberrascht worde.

Aber doo isch doch no ebbis anders gsi ... denn weniger gueti Erinnerung deerft der Michi ha. Scho vor der Fasnacht isch er flach gläage und laider isch es nit rächtzyttig besser worde. Schlussändig het er miesse passe - esoo isch es denn doch bi niin JOKER blibe!

Fir die kommendi Fasnacht ka me also numme s'beschte hoffe ...

Joker Lädeli: E neue Artiggel

Scho syt Joore isch es e Wunsch gsi vo ainige Mitgליeder bi de JOKER WAGGIS - und jetz isch es ändlig sowyt!

Am 25. Hoornig 2017 isch der brandneu Syydeschaal intäärn vorgstellt worde.



Syydeschaal, baidstytig bedruggt: 20.-

Ab der Waage-Yyweihig - wo am 04. Meerz 2017 stattfindet - isch der Syydeschaal denn offiziell im Verkauf.

E erscht Ufflaag vo 50 Stigg isch zem Bryys vo 20 Frangge erhältlich. Sichere Dir also Dii Exemplar und unterstizt d'JOKER WAGGIS dermit. Miir bedangge uns härzlig.



Unter der Lupe: Der Fäb

In dääre Rubrigg wird allewyy ai JOKER genauer voorgstellt. Diesmol näme miir der Fäb unter d'Lupe.

72stunde: Wie alt bisch Du?

Fäb: 36.

72stunde: Wo bisch Du dihim?

Fäb: In Muttenz in der "Cremeschnitte".

72stunde: Was machsch brueflig?

Fäb: Stellverdrättende Laiter im ene Gartecenter in der Region.

72stunde: Was machsch Du in Diiner Freizyt?

Fäb: Zyt verbringe mit minere glaine Familie, FCB-Mätch go luege ... und nadyrlig d'JOKER WAGGIS.

72stunde: Syt wenn bisch Du bi de JOKER WAGGIS?

Fäb: Eem ... hmm ... gueti Froog. Bim S.H.I.T. s'erscht Mol - das miesst d'Fasnacht 2011 gsi syy.

72stunde: Wie bisch Du denn zue de JOKER WAGGIS gstoosse?

Fäb: Ich ha vor ainige Joore emol em Patrick - em ehemoolige Oobmaa - verzellt, dass ich au gärn

wurd aggtiv Fasnacht mache. Ich ha also mi Interässe aagmäldet. Ebbe zwai Joor speeter het er miir denn aaglitte. Es sig e Platz frey worde und ob ich nit emol mecht an der näggschte Sitzig im NelsonPub verby luege.

Will alles passt het, bi ich esoo bi de JOKER WAGGIS uffgno worde.

72stunde: Was isch Dii spezielli Funggzioon bi de JOKER WAGGIS?

Fäb: Joker fir alles! Vo Waagebau, iiber gstalterischi Sache am PC, Mooleraarbe, bis hii zum Glygge-Fottigraf. Hald iiberall e bitz ebbis ...

72stunde: Weeles isch Dii bishär scheentschs Erläabnis mit de JOKER WAGGIS?

Fäb: Sicher mii erscht Fasnacht als Aggtive. Und nadyrlig au d'Fasnacht



2014 mit em neue Waagiswaage. Nääbe der Fasnacht isch miir vor allem der Verpfliäggsstand am BaselTattoo in Erinnerung. Deert hän miir e super Laischtig abglieret!

72stunde: Was sin Diini Wansch fir d'Zuekunft bi de JOKER WAGGIS?

Fäb: Bim Lotto gwinne, dermit sich d'JOKER WAGGIS e neu Garage finanziere kenne ... und viilicht wiider emol e neue Waage. Und ganz glaar wyterhii gladdi und erläabnisrychi Zytte mir der Glygge.

Vorschau Basler Fasnacht 2017 - s'Programm vo de JOKER WAGGIS

Au in dääre Usgoob vom **72stunde** git's wiider unsere Fasnachts-Fierer. Uff d'Fasnacht 2017 het's allerdings glaineri Veränderige gää, zem Byspiil hän unseri Pauseplätz und -zytte e weeneli miesse aapasst wärde. Dangg em Routeplann hän unseri Familie, Frinde, Fans oder Passiv-Mitglieder aber wyterhii d'Meegligkait, uns JOKER WAGGIS live z'erlääbe ...

Fasnachts-Mäntig

13:30 Uhr

Start am Wettstaiplatz (1)

14:30 Uhr

1. Pause am Claraplatz (2)

15:00 Uhr

Wyter goot s ...

16:00 Uhr

2. Pause in der Staine (3)

16:30 Uhr

Wyter goot s ...

17:00 Uhr

3. Pause bim Banggverain (4)

17:30 Uhr

Wyter goot s ...

18:00 Uhr

Waageleere am Wettstaiplatz (1)

19:00 Uhr

Waage versoorge

23:00 Uhr

d'JOKER WAGGIS uff der Gass



Fasnachts-Zyschtig

14:30 Uhr

Start am Barfi (Stadtcasino)

18:00 Uhr

Ustusch Binggis- / Bar-Wäägeli

19:15 Uhr

Nachtässe am Rümelinsplatz

21:00 Uhr

Birsig-Sinfonie bi der Draischiiibe

23:30 Uhr

d'JOKER WAGGIS uff der Gass

Fasnachts-Mittwuch

13:30 Uhr

Start am Wettstaiplatz (5)

14:15 Uhr

1. Pause bim St. Albangrabe (6)

14:45 Uhr

Wyter goot s ...

16:00 Uhr

2. Pause in der Utegass (7)

16:30 Uhr

Wyter goot s ...

17:15 Uhr

3. Pause bi der Mäss (8)

17:45 Uhr

Wyter goot s ...

18:00 Uhr

Waageleere am Wettstaiplatz (5)

19:00 Uhr

Waage versoorge

23:00 Uhr

d'JOKER WAGGIS uff der Gass

04:00 Uhr

d'JOKER WAGGIS am Ändstraich



Guetschhyyn

Geege Abgoob vo däm Guetschhyyn an unserer JOKER BAR an der Muttenzer Fasnacht 2017 griegsch Du e Willkommens-Dringg nach Waal gratis!

Name: _____



MUTTEZER FASNACHT